

Soalan No: 84

PEMBERITAHU PERTANYAAN DEWAN RAKYAT**PERTANYAAN : LISAN****DARIPADA : PUAN HAJAH FUZIAH BINTI SALLEH
[KUANTAN]****TARIKH : 10.8.2017****SOALAN :**

Puan Hajah Fuziah Binti Salleh [Kuantan] minta **MENTERI PENDIDIKAN** menyatakan statistik terkini selama 5 tahun bilangan kes buli melibatkan pelajar sekolah rendah dan menengah di seluruh negara dan faktor berlaku perbuatan buli serta nyatakan secara terperinci langkah yang diambil oleh Kementerian dalam memerangi gejala buli ini.

JAWAPAN

Tuan Yang di-Pertua,

Peratusan murid terlibat dalam salah laku buli yang direkodkan dalam Sistem Sahsiah Diri Murid adalah terkawal dengan trend yang menurun. Sebanyak 0.08 peratus murid yang melakukan salah laku buli pada tahun 2012 dan 2013, 0.06 peratus murid pada tahun 2014 dan 2015, dan 0.07 peratus pada tahun 2016. Dalam tempoh Januari hingga Jun 2017, sebanyak 0.02 peratus murid terlibat dalam gejala tersebut.

Faktor keluarga, individu iaitu murid yang menjadi pembuli, pengaruh media, sekolah dan persekitaran adalah antara faktor yang dikenal pasti menyebabkan berlakunya gejala buli ini.

Untuk makluman Ahli Yang Berhormat, Kementerian Pendidikan Malaysia (KPM) sentiasa memandang serius dan mengambil beberapa langkah proaktif dalam membendung gejala buli melibatkan murid di sekolah. Antaranya melalui usaha pencegahan dengan pelaksanaan arahan beberapa surat pekeliling seperti Surat Siaran Menangani Tingkah laku ala samseng dalam Kalangan Murid bertarikh 11 Mac 2009, Surat Pekeliling Iktisas Bilangan 8 tahun 2010 Garis Panduan Mencegah dan menangani Perbuatan Buli dalam kalangan Murid di sekolah, Surat Siaran Pematuhan Garis Panduan Mencegah dan Menangani Perbuatan Buli dalam kalangan murid di sekolah bertarikh 11 November 2014 dan Surat Pekeliling Iktisas Bil 7/2011; Pelaksanaan Standard Operating Procedure 1:3:7 Pelaporan Dan Tindakan Menangani Isu Disiplin Murid tahun 2011.

Usaha pemulihan dan bimbingan kepada mangsa buli juga dilaksanakan melalui guru bimbingan dan kaunseling sekolah dengan kerjasama ibu bapa dan Agensi Anti Dadah Kebangsaan. Bagi memantapkan langkah pencegahan dan penguatkuasaan disiplin murid termasuk gejala buli, KPM telah menjalinkan kerjasama dan NBOS dengan agensi luar seperti PDRM dan ATM, di antaranya melalui Program Remaja Berwawasan.